

乾隆杭州府志

杭州府志卷九十二

人物七 義行

晉

孫拯字顯世吳郡富春人吳平後爲涿令有稱績陸機旣爲孟玖等所誣收拯考掠兩踝骨見終不變詞門生費慈宰意二人詣獄明拯拯譬遣之曰吾義不可誣枉知故卿何宜復爾二人曰僕亦安得負君拯遂死獄中而慈意亦

死晉書陸機傳

南北朝

范叔孫吳郡錢塘人少而仁厚周窮濟急同里范法先父

母兄弟七人同時疫死唯餘法先病又危篤喪戶經月不

收叔孫悉備棺器親爲殯埋又同里施淵夫疾病父母死不殯同里范苗父子並亡范敬宗家口六人俱得病二人

喪沒親鄰畏遠莫敢營視叔孫並殯葬躬卹病者並皆得

全鄉曲貴其義行莫有呼其名者孝建初除竟陵王國中

軍不就

宋書本傳

范元琰字伯珪錢塘人父靈瑜居憂以毀卒元琰時童孺哀慕盡禮及長博通經史家貧唯以園蔬爲業嘗出行見人盜其菜元琰遽退走母問其故具以實答母問盜者爲誰答曰向所以退畏其媿耻今啓其名願不泄也于是母

子秘之或有涉溝盜其筭者元琰伐木爲橋以渡之自是盜者大慙一鄉無復草竊

梁書本傳

## 五代

褚雅字元道錢塘人梁末隱句曲山中輕財重施拯物無厭營田若熟以乞貧者與人共居常早起灑埽取水偏以周給覓樵薪乞人夏月種瓜任貧人來取不計也

茅山志

張儼餘杭人好學有賢德不樂榮利嘗開圃種匏以所貿

錢造橋俗謂葫蘆橋

咸淳志

按張儼省志兩載一作後漢一作五代叢事蹟則一人也今據咸淳志列于五代以咸淳志所稱後漢乃五代

劉漢耳

宋

焦中山鹽官人素好義自雍熙四年戶祝許睢陽至天聖九年遂捨地祠張許並塑其像時王可回曰中山一邑義士因名其坊曰忠義舊海寧縣志

俞舉善錢塘人累世同居號義門明道二年旌表門閭

成化

舊志

葉曙字果卿錢塘人授桂州司法家故饒財諸弟盡用之而求異籍曙喟然曰家事至此繇吾祿不足以聚親族耳汝曹何咎在桂有吳謐爲象州武儀令而死其妻挈二女

歸閩至桂而妻又死曠哀其無歸娶爲二子婦焉

浙江通志

按曙舊志作杲卿誤以字爲名也今從通志正之

何押錄餘杭縣吏自壯歲爲小胥馴至押錄持心近恕畧無過愆前後縣宰深所倚信又兼領開拆之職每遇受訟牒日拂且坐于門一一取閱之有挾詐姦欺者以忠言反覆勸曉之曰公門不可入所陳旣失實空自貽悔何益也聽其言去者甚衆民犯罪麗于徒刑合解府問顧其情理非重必委曲白宰就縣斷治其當杖者又往往諫之使寬嘗置二竹筒于堂時擲三兩錢或一錢于筒中諸子竟不深曉迨謝役壽終始告之曰吾免一人徒罪則投一光錢

于左筒免一杖罪及諭解一訟則投一糙錢于右筒剖之皆充滿無餘地遂卒後十年子鑄登儒科紹興中位至執政累贈其父太子少師

夷堅志

蔣崇仁杭郡人居興德坊喜賑施每秋成儲穀卽踊貴如原直售之且聽糴者自量或捐與飢者終時屬二弟力行好事里人德而祀之

西谿志

元

凌善之新城人元季隱居不仕讀書飲酒嘯傲自若至正間歲大饑乃傾貲煮粥以濟貧餒人有逋負悉焚其券鄉

人德之

舊志

賈執中海寧州人字希賢與弟用中並負俠好施承父志  
建義塾于家奉先聖像配列諸賢後立講堂祔從祀主備  
禮器倉庾庖湗所儲經史百家言割贍田八百畝聘名師  
莅之教其邑之子弟鄰郡之士聞風而來相與講義洽聞  
咸取具于此至正十八年事聞授執中山長括蒼劉基有  
義塾序海寧縣志

賈用中執中弟海寧州黃岡人捨田百畝入儒學州牧上  
其事于郡先是州之人士未始有與計偕者已亥賈二子  
祥麟祥鳳俱中式萬歷舊志

馬宣教以行稱萬十一其先汴人宋靖康間扈從南遷徙

居鹽官黃灣里煮海致富值歲祲羣湏丁將散去宣教出  
粟賑貸猶不贍變產殖以活之已而家益饒與黃岡賈氏  
兄弟並以貲甲一郡復起樓聚書萬卷延徐一夔貝瓊諸

名儒教其子弟亦同賈氏義塾云時元末兵起張氏據吳  
方氏據越所在殘破而靈泉一鄉獨全則宣教保障之功

居多海寧縣志

何宗實字誠甫其先由東平徙杭遂占籍爲杭人仁孝慈  
愛所得俸奉母外以覃于族兄宗茂同居無間言妹一人  
適戴氏戴沒給養其家子女爲之嫁娶鄰婦有哭甚哀者  
問之喪其良人貧無以治棺卽購之他日婦至請備以償

值曰周汝急豈望報乎婦謝而去

楊維楨撰墓志

朱景仁海寧人事父母以孝聞待宗族煦然有恩外嫗亦如之交遊敦相卹之誼元季四方衣冠之士避地海寧者景仁悉解衣推食與同甘苦屢徵不就自號貞白道人

兩浙

名賢錄

明

朱燧字質夫海寧人父圭以明經起家嘗捐腴田以益學廩宜城貢師泰知名當世至正末道梗居寧之北郭燧具舟迎歸其家後貢卒燧爲經紀其喪捐地以葬別置田供祭明初會詔興學杭守辟之講藝錢塘侍御史薦于朝除

粵東寧遠令

浙江通志

按朱燧舊志誤作宋燧今從省志改正

柴望字宗禮錢塘人爲人樸茂見義輒爲有友括蒼金觀者前元某州學官退居錢塘母沒病不能葬以哀毀沒而其妻繼殞望哭曰吾友之不幸至是哉子且孱弱三喪在前吾責也乃捐貲爲治喪及告于觀所常往來者因得舉從其先兆葬焉人義之徐一夔爲作義行記

成化舊志

劉均美號閑耕錢塘人世以醫名讀書通大義待異母弟如同母讓產悉與之洪武間以閭右徙寶京師仍以醫行喜居善藥售不二價又喜施故四方持重價走均美市藥

者日無筭而貧無錢走丐藥者亦無筭均美且起視丐者先之而後及市者郡人許昉遊國學貧無以自給均美延之家昉死爲之殯殮歸其棺年九十而卒

西湖遊覽志

沈寧字怡菴海寧人成化初以國子助教致仕爲人凝重無疾言遽色至于拯危急恤弊獨皆力行不倦

舊志

徐權臨安人孝友坦易讀書好施予遇歲祲輸穀二百石賑飢隱居教授以終

舊志

徐誼字謬宜海寧人成化十三年海決歲祲誼爲作糜餉之日給數百人全活不可勝計子寬後登進士

舊志

盛濂於潛人天性至孝親病歿哀毀幾絕兄弟五人濂居

長教之耕讀終其身不分析比閭族黨間雍雍如也宣德四年邑大荒濂出粟六百石賑濟全活甚衆輸金築黃泥堰溉田三千餘畝建青壇橋濟人徒涉復置田爲修葺費以垂永久

張允修撰  
盛濂傳

胡瓊號靜庵臨安人正統間有皇木之役前此有以是役破家者時歲大饑民不能完公費繫獄者衆瓊輸已資五百金以完其役里民德之

舊

吳思敬餘杭人好周人之急正統六年發穀一千五百石

賑濟僉民奉勅旌表

餘杭縣志

陳昊字宏夫仁和人初贊顧氏生子鑑妻亡昊年二十五

人勸其繼娶吳曰吾實有子以承祀事忍復求偶以負吾妻耶有兩女弟皆貧而嫠吳爲周給之甚厚

萬歷舊志

孫顯宗字存義惠愛齊井村人成化甲午遭歉歲殍夫塞

途捐粟二千石以賑鬻子女者贖之稱貸者贈之賴以存

活者不可指數事聞召至闕下欲官之堅辭乃于光祿寺

賜宴授正七品冠帶遣還旣而復命地方官咨送其孫景

南以諸生入鴻詞選顯宗欲其子若孫自以勤勞致富貴

率景南陞辭乃已于是降勅旌表爲尚義之門樹坊當道

富陽縣志

王斌臨安人成化二十一年助穀八百石賑荒三院題請

勅建尚義坊賜以冠帶舊浙江通志

吳定遠錢塘人嘗于湖州墅孔公銓家買客相油五十擔  
計直當百金立券三日發油半月歸直券成次日客窩火

吳率人往救之至則油室已在焰矣客哭曰油故假于人

今何以償之有死耳踊躍欲赴火吳急抱止之曰油旣有

成券卽我貨矣若何與半月後來取直耳客猶未信吳因

與俱歸數日卽措銀如券歸之客拜祝曰願公生貴子以

報德泣謝而去吳後生子瓊登進士官至通州守萬歷舊志

董慧字如魯富而好行其德景泰甲戌歲飢輸穀四百石  
成化癸巳海決民流又輸六百石丁酉大飢又輸千石有

司例授以承事郎強之冠帶力辭又輸千石以爲備荒計  
其他置義田葺文廟掩骼建橋諸善事未易枚舉

海寧縣志

程瑞號栗夫臨安人性孝友崇理學捐已地爲文廟壽九

十三詔賜冠帶

舊志

戴信昌化人成化乙巳大饑出穀千石以賑縣人

昌化縣志

馮悅字景和錢塘人宏治中有縉雲施三寄二百金于悅  
家施歸而卒其子不知也久之悅呼其子雲還之封識如  
故雲欲讓其半悅拒不受

萬歷舊志

翁鍾字子聲仁和人事繼母如所生有族叔亡其室貧不  
能自存鍾養之仍周旋其子女尤親禮貧交急患難厚施

而不責其報傭有竊鐘金聘其妻者妻家悔婚願歸所竊

鐘惻然謝無有凡環鐘里居者千餘家飢取食寒取衣婚

姻娶葬取經費俱不置券卽有券而人負之固不較也一

時賢士大夫重之號爲西冷君云

吳遵晦撰  
翁鍾傳

俞鉞好施與嘉靖初輸粟二百石濟荒助濬西湖銀五百

兩撫按上其事贈承事郎

臨安縣志

歸漢字源之錢塘縣南良里人前仁錢兩縣額辦馬價計

每丁出銀二錢有奇漢陳牒臺司請均之各邑奔走經營

罔恤勞費嘉靖癸巳杭守婁志德爲議丁祇徵銀一分九

厘九邑均無盈縮民省重賦又陳昱字任卿錢塘西壁人

以兩邑僉報總甲之役擾民陳牒分巡康朗康下之邑議  
覈戶貧富定爲上中下法多寡徵銀雇募充役均稱便焉

萬歷舊志

按歸渢陳昱及丁仕卿三人皆一時義士也陳善合爲  
贊見萬歷志仕卿上虞人今另列寓賢卷中

沈璋字廷器號存濟仁和塘棲人生平慷慨好施塘棲爲  
省會巨鎮水勢直瀉自宋元以來民居聚散不常堪輿家  
謂宜于鎮之東北隅建像閣以當水之衝璋卽捐貲就古  
清流亭舊址闢基構材建千佛閣高二十餘丈立殿宇禪  
堂鬱爲叢林費貲以萬計里中賴以安居正德己卯歲大

祲璋煮粥餉飢民越兩月全活無筭又發廩米四千餘石  
以貸貧者次年大熟人俱倍息來償堅却之曰吾以周貧  
非以邀利也焉用償于是鄉人咸稱爲孝義沈家子哲合

州司馬孫修山東右布政

丁養浩撰  
沈璋傳

袁晏字文明新城人性好義急人之困不靳賙濟從兄卒  
于京晏跋涉負骨以歸

舊志

董讓字聽雪海寧人樂善好施貧族之以產求售者給其  
銀而反其券開義學以惠鄉鄰遇飢歲輒輸粟千餘石以  
供賑復捐西山爲義塚焉

舊志

許彬字志學仁和人娶趙氏生子若女各二年四十趙氏

歿遂鰥居雖帷幕淒涼終不御姬妾焉

舊志

談龍仁和人以父所貽悉歸于兄父嘉其義聽之後以鄉夫夜直犴獄乃備述民艱奮身赴憇役寢而民樂業至今

感之

舊志

錢科教行尚義嘉靖間連歲淳飢當事設法勸賑入粟五十石者附學入監時科已出貢捐賑獨多巡按舒汀提學孔天允特請照景泰例已冠帶者陞其級授正六品職不支俸科又自設粥廠拯濟里民所居近渡船埠後架木橋徑曲險澗多溺者科特闢所居屋直衝達河且甃石爲大橋行者德之稱南橋以別于橫河東西二橋科後遂以南

橋爲號更名其橋曰萬安

錢塘縣志

吳元良字子匡錢塘人性樂施以節俠自喜父歿遺券數十紙中屬杭人者計資可千餘緡元良悉召其人語曰吾書生雅不習收責事諸君各取券去有固卻者元良勉之曰無庸俟若盈時割餘以佐我酒貲不後也皆感謝去其外屬吳人者貲客稱是元良不知其家特造吳市中焚之譖市人曰願傳語鄉間有負杭吳長公責者吾已焚券無煩歸直也時徐階督學浙中嚴於甄別獨稱元良奇士厚禮之而元良裁謝外一不涉干請亦未嘗以此矜于人

浙兩

錄  
名賢

傅昇號竹亭錢塘人明經授王府官友馬試無子娶妾嫡不容以贈昇昇辭不得有姊失明不字昇卽以其妾與同寢處試妻亡昇仍以其妾歸試後生二子初胡給諫麟謫台幕其子將之台寄二笥子昇子竟溺于湖後昇取二笥還麟封識宛然如故

舊浙江通志

郭文範號型伯海寧人與弟友愛族子有鬻身爲人隸者贖還之迎養寡姑與繼母同居者三十年邑之倉大使翁煌者虧糧坐法將鬻已女爲妾文範輸金與贖兼資給歸之金陵更代償徵人吳兆大百金及廩無告老叟陳郊五年而沒曰子吾殯凡里族故人不能婚葬者時時給之慮

弗逮晚年作生誌自號栩蝶子

郭文範傳

董欽少敦孝友好施予祖父遺貲悉公之族黨萬歷十五六年間歲祲飢餓載道米價踊至一兩八錢發米三千石以賑之全活甚衆三院題旌立尚義坊于縣治之東南又安東塔關一邑文運欽因頽圯特爲改建增五層爲七層稱一邑壯觀又建文昌閣橋于南渠河以聚秀氣年八十五終子汝洲紹述父志乾嶺地僻往來嘗患虎盜爲亭觀俾人有所依庇濬築龍潭便一方取汲徐杭縣志

陳灼昌化人國子生豁達好施赴急困然諾無苟萬歷庚戌有司議造飭學宮方捐俸倡助無應者灼慨然請于令

一切身任之凡費二千七百有奇旬月告成及歿祀鄉賢

祠舊志

周棨號平齋少孤兄某主家政兄死始操家務見子錢契  
券年稍遠者累數千金歎曰田園亦足自給何必營營爲  
作布囊束于臥樓之梁或持鑼償者告曰舊券已毀不取  
矣萬歷戊子歲大祲煮糜十數缸陳于恩波橋以食餓者  
數月不倦或斃于賑所卽爲棺殮之

富陽縣志

陳中漸字風山海寧人爲名諸生喜周人急所貸予常焚  
券不責償市有持贗銀行哭甚哀問知爲里僧所欺卽自  
探懷中銀如數與之有丁氏鬻房產已受價徒矣復據之

中漸憐其貧爲更授價及割他產予之有韓太史者嘗負  
中漸債已死其妻齎錢幣請償中漸謝不受某氏女坐怨  
家誣讟不能自明中漸挺身御史前白其冤年五十五卒  
子二並中進士贈給事中

舊浙江通志

周柯號一巢富陽人樂于爲善遇歲歉捐粟賑飢有疾疫  
捨醫藥棺柩寒卽施衣續人有急難多方周濟有鬻妻質  
子者必傾貲贖之里人共推爲長者

舊志

沈煥然字無文餘杭人天啓辛酉舉人授會稽教諭加意  
興學作人一時嚮風轉廣東徐聞縣尋轉福建衛經歷致  
仕歸惟與嚴調御兄弟講學著書鄉評推重五舉飲賓凡

繕學修志開築天竺一陡門及焚券施學恤苦拯貧諸事父

老至今傳之

餘杭縣志

俞良謨字龍淵好陳民間利弊一議甦鹽竈之困一議豁解役之繁爲公事破家沒齒無怨寧民利之

海寧縣志

關大生字玉門錢塘人九歲而孤事母霍以孝聞性任俠家致千金隨散去戚黨中多賴以舉火里中貧兒負急債欲鬻其妻大生代償之使復完聚有中年患瞽不能治已去爲丐延至家療之瞽旋復明冬寒大雪煮鬻濟貧民全

活無筭子

錢善志

吳憲錢塘人性謹厚喜義舉初徽商子弟不得與杭州試

憲力請于巡鹽上疏報可乃立商籍得入學于府仁錢三  
學至今仍其制

舊浙江通志

徐季韶字鹿園海寧人父輅與歸有光陸樹聲爲同年生  
季韶偕兩弟維揚繪觀肄業南監時人目爲三俊戊辰海  
嘯漂沒數十萬家隔江浮棺若鳬雁之集季韶斥腴田數  
十畝瘞埋之辛巳歲大祲沿塘設粥厰十五所日費米三  
十斛又開藥局救瘟疫存活甚多

舊志

查允元海寧人崇正癸未進士以參政歸捨田四百畝以  
贈族之貧者特建宗祠以敦一本

舊志

吳繼志字惺陽海寧人以歲貢爲越州衛經歷終養乞歸

爲人讀書通大略事父母以孝聞崇正庚辰辛巳之災出

積穀爲郡縣倡所全活者無算

舊志

甯志組字質之仁和人年二十娶孫氏生二子孫氏病歿

終身不娶

舊志

鄭曇號錦溪臨安人歲大饑死者枕籍曇施棺爲殮出穀

三百石賑濟全活甚衆

舊志

翁道魁號元錫臨安人崇正間舉賢良方正薦疏稱其家

貧力學孝睦克彰

舊志

吳元溟字澄甫事繼母以孝聞女弟少寡無依迎養于家  
終身無間言故人程生負課千金久繫元溟卽代償之崇

正庚辰歲大飢出橐金往江右糴米五百斛悉散于親友

投光祿丞年八十二卒

錢塘縣志

沈起虬字幼良仁和諸生與錢塘徐行志以醇行稱崇正辛巳歲大飢鬻產市穀以賑復市樽以施無殮者有負漕而鬻女者代輸漕而還其女同里王一奇亦發穀三百石以賑飢鄰家爲官債所迫計鬻妻女將成券矣王又代償

三百餘金竟不責報

舊浙江通志

嚴武順字訥之餘杭人太常大紀次子明季辛巳歲大祲武順力請當事勸里中大姓賑粟更經畫賑法俾官不煩而民普濟全活無筭是時山寇蜂起戶不安枕武順謀于

邑長督修武備富者出財壯者効力延智勇以保疆圉或  
難之武順曰富者出財非散儲也正所以保其富强者出  
力非藉捍也先令其不爲盜已而邑藉以寧三世同居家

庭雍睦

國朝順治十六年入鄉賢祠

鄉賢留祀冊

王錫袞昌化人天啓七年官霍山知縣念父乞歸仁厚樂  
施嘗捐金倡率族人立祠沙干以奉祖先歲時蒸祀無缺  
宗黨姻戚時時有所賙予未嘗與貧佃較銖息崇正十二  
年遇大祲出穀百餘石賑濟又每石減糶如常歲里中賴  
以存活者甚衆又置義塚地于橫溪橋

國朝康熙十一年入鄉賢祠

鄉賢留  
祀冊

章希義富陽人慷慨好施天啓中浙東大饑盡發所儲廩粟分給飢民賴以全活者甚衆宗族有不能婚嫁者爲之捐資擇配不能就學者設義塾以教之代出脩脯里中有爭鬪者必曰寧爲刑罰所加毋爲章公所短

國朝康熙十五年入鄉賢祠

鄉賢留  
祀冊

陸奇錢塘人崇正壬午舉人仁心爲質輸粟賑飢多所全活建議修築海塘破產獨輸千金重建鎮海樓多隱德遇亡不亂解寃獄却暮夜金贖人婦女有客寄貲旅亡道梗閱三載後招其子付之封識如故

國朝康熙二十四年入鄉賢祠

鄉賢留  
祀冊

胡廷試字玉呂仁和諸生工詩文鄉黨稱其尚義

武林道  
古錄

戴鉛昌化人宏治甲子俞東明倡亂與兄鑑弟詮結衆爲

禦閭里賴以保全邑大饑吏沈江罔令藉賑饑姓名類皆

冒妄而饑者殍盈郊野鉛懇言吏弊于白參政卽罷江死

疏劾令去而饑者始得實賑子璪弁冕甫皆登仕籍

昌化  
縣志

方杰字子凡錢塘人天啟辛酉舉京兆試例選縣令以父

老病遽歸崇正十年舉賢良方正力辭嘗置義田以贍親

族值歲祲與同志設粥厰食饑者

國朝督學鄭開極請祀鄉賢

錢塘  
縣志

汪與進新城諸生伯兄早世奉嫂至敬撫幼弟至友愛有何長生者逋富家金沒爲奴贖之不責償崇禎十四年饑同邑孫宋壽有三子鬻二子自活溺其一于水與進見而憐之收養于家歲登遣歸

新城縣志

潘慧道錢塘人六歲而孤能自樹立崇正辛巳歲饑里人以婦斃鬻其子輸金止之里人以其子歸慧道慧道堅勿受里中火有以爭地界構訟者慧道曰所爭尺寸爾幸與吾接壤割地與之寢其事郡守義之舉飲賓

舊志

項大章字孟煥錢塘人崇正辛巳饑爲粥以食餓者同里有負國租鬻妻者代輸之

浙江通志

夏璜富陽人江東兵亂集鄉丁捍衛既而賊大至璜知不免自剄死

富陽縣志

高克臨字敬可號古處仁和人福寧知府汝梅之孫舉人時亮子也甫晦喪母叩和啼呼哀動觀者汝梅絕憐愛之補諸生有聲場屋兄弟羣從間友愛甚擊遇人猝需急難收視溫恤不可勝計崇正末閩俘之至杭者無虛日呼聲入冥惻然贖數人以始事後遂踵而行之嘗曰吾力有限吾心無窮常存真實心隨所可行行之而已

南雷文案

國朝

沈穆字旦及錢塘人以歲貢試大廷非其好也嘗受業吳

太冲吳以訟事牽連并逮其弟太淳穆慨然曰吾師坦白無他奈何波及其弟乃匿之自假其名以質對事得白已乃游燕薊楚豫閩粵間諸大吏皆聘迎之以母病冒雨走數十里延醫致疾卒

錢塘縣志

沈謹清餘杭人性好施予置義田贍族姻之貧者明季歲饑捐賑兩舉飲賓

餘杭縣志

傅謙字孟貞仁和人明季都中疫捐金購得神針法多所救活有故人羈死爲其二女擇婿嫁之葬其祖父養其母二十年不色倦

舊志

姚膺元仁和人娶妻廟見畢語之曰吾同胞有吾二妹伺

所欲與之雖盡吾資勿慮也妻遵所誠女甥之婿徐爲廣  
東都事運貢入京至黃河舟覆陷大辟膺元力償救得免  
徐誠子孫曰吾身家皆姚翁再造也

舊志

朱紹元字善先仁和人崇正十四年大饑紹元陳策當事  
蠲金賑濟活者無數

舊志

姚大來字龍起郡庠生崇正末歲游饑捐金設廠捨粥全  
活萬計父歿幼弟三歲教育之至于成立舉父所遺盡畀  
之時有陳大者妻子五口沒入營伍旣而隊長縱之歸則  
大來贖之也以問大來大來則秘其事

舊志

邵泰卿字九卿錢塘人經邦曾孫崇禎辛巳饑爲粥以濟

族人相久暴者購地塗之子遠平

浙江通志

陳金枝字體全仁和人好施予賑荒築塗助婚矜撫不以有無爲解亦未嘗有德色

舊志

沈學曾字三省仁和人里中陳姓者以逋負繫獄妻子號泣假貸學曾解金脫之施氏子貧甚將鬻其婦學曾愀然曰奈何以貧故析其偶給之錢粟伉儷獲全友人王某父亡貧不克葬葬之章某歲除窘楚不欲生學曾爲傾橐拯

之

仁和縣志

陸文銳字仲純仁和人嘗散家財給貧乏方某病卒托遺孤文銳婚嫁其子女辛卯杭州饑設粥以待餓者廵道熊

光裕爲之立匾

舊志

查大統字瀛海海寧人邑頻年旱邑令急催科代輸活數百人會邑豪某敗御史論貳十萬既籍豪產下令以豪所應出者派民間民懼轉輶丐免大統獨慨然出數十年積

貲代豪輸官

海寧縣志

查嗣鑄字敷齋海寧人行誼甚篤族之貧而有志者資之甲辰潮溢濱海多窮民爲之運水煮粥饋送浹旬勿倦

嘉慶

正撰查  
嗣鑄傳

邵士俊字允恭餘杭監生凡邑徭役興革皆身任之順治間清查田畝有絕塚賦攤各里士俊呈縣歸已戶納糧每

歲祲輒施粥康熙甲寅閩變士女遭掠者捐金贖之

舊志

陳之間字希亮海寧人行義甚修邑有力役之政當路詢之必抗言不阿歲飢倡議捐賑之間主辦母冒漏寒者衣之亡者殮之歲以爲常置西門外地爲義塚

浙江通志

何爾彬於潛人縣南四十里七坑險窄峭壁五十餘丈矗溪中其下小徑盤曲二里許行人往往失足爾彬築成坦道歲旱捐賑有姪十餘輩教育如己子親族待以舉火者數十家邑中重構學宮獨建兩廡

浙江通志

顧景祚錢塘人壽昌學博捐修學宮請奏廣入學之額改小學爲巾學有負債將鬻妻者代償之友某無子贈之妾

浙江  
通志

方正於潛諸生好施予間黨有貧乏者往往依賴之嘗捐築藻溪二橋砌藻鎮街數里

於潛縣志

孫伯玉字美之富陽諸生歲饑輒發粟賑濟順治初山賊竊發令朱陞臣素知其急公好義屬以捕輯賊寇伯玉持官檄布德意賊頓散有饑寒不能存活者請發帑給之伯玉亦竭家貲以助

浙江  
通志

俞世贊仁和人敦孝友慷慨重信義父墮水贊投急流中拯之出常捐金濟遠商之不能歸者子森官河判世贊往爲畫治毀家以襄工

舊志

周垣字輿衛仁和人年十一避寇母兄相失獨携幼姪竄澤莽間晝伏夜行越數日得達母兄所姪賴以存析產于兄子倍已之半有貧士館于其家病不能歸力爲醫治既歿厚其殯葬恤其家設藥局施病者三十餘年鄰有以所居售者垣給其值而完其產子霸浙江通志

徐欽安字翼鄰仁和庠生叔父卒爲從弟娶舅亡爲之殯葬撫其孤舊志

江之浙字道信鑒子也弱冠餼邑庠與虞宗政宗瑤張岐然及從兄浩爲讀書社師事陸鳴煙患難存恤無不至及死而厚殮之周恤三黨孤貧闢後堂教授垂四十年錢塘縣志

吳炌字睿思錢塘人四歲母病不食炌號啼亦不食及母病稍瘥始進食年十五家遭誣奮身庭質巡撫蕭起元憇之遂得白順治庚子歲饑炌倡捐賑條議十里置一局局設數村民不告災嘗上巡撫范承謨七郡水利書萬餘言嘗代償畧民張佛鬻妻金皆義舉也

浙江通志

毛應鑄字叔成仁和人少孤母携五百金挈應鑄往依宗家長者既而不歸所携母欲往詢應鑄以爲尊行也且撫我久勸母勿言族有寡嫂迎養終身有貧不克葬無居址者悉爲經理年八十一卒子先舒

浙江通志

駱用亮臨安人與人交篤于義精岐黃術能濟人

舊志

王之策字殿揚錢塘人順治辛丑進士三藩弄兵紫溪羣賊踞邑而饑民附之太守奉檄進勦邀之策與俱之策大言此非勍敵撲滅何難第此新城昌化間皆民也民何可與賊共勦分別之卽以民勦賊賊平晚年修橋道掩枯骼購禁方攢藥施濟建育嬰之社爲人解紛遇可道地輒櫻冠不暇以是遠近承教者無虛日

西河集

孫培明字惺來幼爲季父後兩盡子職

國初清查一田兩稅之弊培明籲控得奏免者凡八邑爲田

二萬一千六百一十畝有零

浙江通志

胡富姚正經俱昌化人富三世同居總家政無所私曾捐

義穀置學田十畝正經亦惇子收族與錢通不責償歲歉  
獨力賑一鄉之民

舊志

胡守雲昌化人父母早歿奉繼母庶母皆盡禮撫孤姪如  
子丙子辛卯賑饑里中

舊志

周臨吉富陽人嘗捐千金修學復修城隍廟砌街數百丈  
歲飢煮粥以賑并置絮衣給貧者

富陽縣志

吳維烈錢塘人少孤事母孝見義勇爲捐數百金助開城

河建橋梁子孫亦慷慨好義曾設粥廠以活飢民

錢塘縣志

凌克閭錢塘人七歲喪父事母孝養會兵燹有失所者厚  
恤之火燼其廬猶拯恤隣之被灾者厚

錢塘縣志

葉日章錢塘諸生家貧重然諾有趙某爲延津令延日章謀其子趙暴卒子幼日章爲經理後事歸里教其子成立

錢塘

縣志

裘自謙字叔美錢塘人仕至長史以母老病告歸歲饑出

粟賑貧者有司以是建尚義坊

舊志

鄭允珍臨安人至性淳朴樂施濟勞心費財無德色人高其義而服其量

舊志

姚士章字斐成錢塘監生甲寅閩變贖被掠者二百餘人邑獄舍卑濕囚易染疫請于官獨輸金改造會建育嬰堂當事使主辦費不足輒解囊無少吝貢院省試舊無蓬廬

諸生立門外率患風雨土章捐資但設自是循之不廢江

通志

戴有怡錢塘人嘗捐賑

兩浙鹽法志

吳維楨字左廷錢塘人贍被掠之子女捐千金爲之制府

李之芳獎異焉

浙江通志

沈晉垣字亮宸仁和人九歲而孤已通五經侍母疾數年不解衣爲諸生文名籍甚旣而學醫遇危疾應手輒活當事以疾召之無私謁益重其品浙人困徭役乃建議于范中丞行落甲催徵法至今賴之崇祀鄉賢

鄉賢留冊

吳也魯字次愚仁和貢生居父母喪悉遵家禮生平好施

予捐資以修學宮售產以贖難民精岐黃術不受謝堅不能却則以之施衣以之施棺木

兩浙鹽法志

郭紹尹字宋臣居武林孝友性成好施予餓者待食寒者待衣病者待藥棄兒待育遺骼待掩橋梁道路待葺凶年飢歲待賑數十年無倦容寅卯間俘掠子女泣聲載路散家貲不給請于縉紳巨室得五萬餘緡子女見還者凡五千餘家其最著者暨陽陳烈女未婚被掠將自剄紹尹先覓得其婿歸合巹于家口猶吾女也松陽詹某爲知名士脫其母及子女五人分宅贍膏火歲終還鄉黃巖黃嘉文婦蔡石桑女也乙卯八月城墮引刀就死軍人憾之收縛

遺子女無還理紹尹用奇計脫之其他不可殫述舉五子長一泓以明經高丞猗氏次淇年十八領壬子鄉薦第一

林瑤歲  
寒堂集

王咸亨字虛寰餘杭人食餼邑庠蘇紫溪督學兩浙稱人文衡鑒拔咸亨第一諭多士文以咸亨爲師式嘗有鄰人竊入其室咸亨厚遺之勸爲善乃悔過成家咸亨死其人痛哭自述人始知之舊志

項日永字其譽錢塘人賈于閩會閩變道梗日永日夜思父母棄資間道歸夜行晝伏逾年得達居一載父母相繼歿哭泣盡哀姊歸于汪爲里人構訟波及日永白其冤一

日詣姊見晨炊未舉趨出解衣易米爲具比歸妻曰家有  
米答曰吾恐姊飢不能待也康熙丁亥戊子間歲大歉出

粟以賑自江干達湖墅沿途人人給半升活者無筭

浙江通志

楊士雅字晉彥錢塘人康熙戊午武舉居家孝友親族之  
貧者周之戊子秋禾中程生應省試卒于逆旅爲捐資治  
殮歸其喪嘗買一婢詢之乃所知者女亟遣歸不問值浙

通志

童養廉昌化人嘗捐修學宮建文昌閣歲旱蝗出錢粟濟  
貧人鄉中死無所歸者買棺殮之貧鬻妻者捐金止之親  
友子弟有志讀書者給以膏火無吝色

浙江通志

章煜新城人好解推而無德色邑之周王廟側貯棺施之數十年江漲溺骸暴露置義塚聞家堰募人殮埋復置義田數畝付琪樹菴僧爲春秋祭費南津橋圮于水獨力修葺之凡遇饑僅必捐輸爲紳士倡

浙江通志

葛章字闇如餘杭庠生負異才義氣倜儻明末歲大祲施館粥或量口授粟有所貸不計其值飢民爲盜所在焚掠獨相戒不入葛巷孫敏登康熙辛酉賢書

舊志

沈萬祥於潛人里有貧不能婚葬者出資相助負債不能償者焚其券火延族人十餘家撤已屋居之并膳給焉造義塔收藏齒骼建橋路涼亭甚多邑令舉飲賓

浙江通志

潘衡海寧人嘗往長安倉兌漕載星而行途中得一大匣貯遺金三百餘兩訪失主還之

海寧州志

陳之遷字定菴海寧人嘗割產以廣母家祭田又置贍族

田若干畝

海寧州志

王萬賢字敬川海寧人性長厚以貧棄舉子業行賈雲間居停主人迫冗與之貨以誤而多解維覺之亟還完其貨遇歲歉爲糜以賑有士人貧而鬻妻周結之完其夫婦

海寧州志

州志

程士麟字晉侯海寧監生康熙四十七年邑大水饑士麟捐米千二百石設粥厰五所助賑邑令何大祥獎之

海寧州志

胡法遠錢塘人倡紳士捐田四百畝以歲租賑囚名曰監

田又施粥甘泉菴歲以爲常

錢塘縣志

汪燦錢塘人慷慨好義從弟負博燦代償之至毀家

錢塘縣志

王耀錢塘諸生康熙中薦賢良力辭待族戚溫厚貧者恤

之雖數至無吝色

錢塘縣志

何翰錢塘人有妹早寡贍之招其孤撫之故人章遭訟鬻女以金止之陸某飢寒解衣衣之又質婦簪珥以給之

錢塘縣志

縣志

董汝涇餘杭監生母早世能體父志事庶母曲盡奉養若

溪洪水爲害募漁艇數十救溺者數百人

餘杭縣志

汪以澄仁和人刑部陝西司郎中居鄉多義舉嘗置祭產  
凡貧不能葬及壯未有室者悉資之賑飢施棺修學宮補  
祭器夏施蚊帳冬給綿衣濬渠修橋砌路善行種種

浙江通志

裘倣誠字靜沚錢塘恩貢生性孝友母歿結素幔于柩側  
題曰永思廬伯兄早逝撫其遺孤成立人有急難叩其門

卽素不相識者必竭力以濟積逋數萬緡悉焚其券姻族

中餽寡困乏者歲計所需給之

浙江通志

晚年留心養生家言

至大耋齒落復生以子充美貴封御史

續賢留祀冊

翟士奇字俊卿仁和人父朝英性狷急意偶拂杖輒隨之  
士奇能娛適其意仲弟士秀喜結納施予所需取之士奇

鄰里故舊間推解緩急歲數百人閱十年一焚其券米翔  
貴出粟里門平糶康熙庚寅歲祲市米三百餘石計近里  
貧戶口口日給一升者月餘年七十三卒葬積慶山草堂書帶

集

王元佐字又章父二瀛仕爲潯陽叅軍解任歸里孝養唯  
謹雖牽車服賈不廢讀書爲人重義敢任事

國初邑令顧咸建仗節死無敢殮者元佐爲之倡與章華許  
孝恭合詞請于貝勒許之始殮而送其喪歸錢塘縣志

孫有威餘杭人務篤行每歲祲出粟賑飢免租貸息取貧  
者券悉焚之然諾千金不易浙江通志

葛道明字元亮仁和人宗族有七世未葬者毅然任之卜葬二十餘柩同學江我正構重獄道明營解得釋與人交然諾不苟見義必爲卒年九十浙江通志

張鍾發字會生錢塘人兄弟三人鍾發以已子女無多讓父遺產客新昌鄭逢可夫婦負債鬻身償其債更給資使之治生故人子沈國器聘金氏女孤貧未能娶以五十金爲之婚康熙四十七年客嵊縣歲祲民乏食倡輸百金勸同遊及本邑富室捐資煮粥飢民賴之浙江通志

高鳴鶴富陽貢生幼年自塾歸道拾浦江木工陳君德遺金十二兩揭招驗還叔母王無後欲其承嗣以非應繼力

辭及王歿爲置祭田邑有蔡某窮困借銀經商日久虧折  
鳴鶴鬻產代償之嘗修文廟製藥施病疫者全活以千計  
遇歲歉貸窮民穀力不能償者焚其券綿衣棺木之施歲  
以爲常省志

陳克鑑字宇人海寧人官工部主事修學宮設義塚于十  
八圍收葬遺骸中表閔某無嗣爲理三喪有族人客死都  
中爲之殯殮歸其旅櫬寡婦父金氏貧困完其夫所鬻產  
歲飢施粟冬施衣里人德之浙江通志

許頤齡字友期錢塘監生其族自新安遷杭者甚衆頤齡  
多方提携貧不能婚葬者助之家素業鹽其友負鹽帑萬

餘金頤齡倡捐代輸無吝色

浙江通志

方予泰於潛人好施予歲大饑出粟以賑修塘路掩遺骸  
收恤孤寡周濟姻族爲之不遺餘力有訟者捐資以息之  
完國課必爭先有司給匾旌其門

浙江通志

馮鼎珵於潛人每歲春出穀八百石計里中口借之秋收  
不取息歲偶飢出粟賑濟戚友逋負力不能償者焚其券

浙江通志

方擢字書升錢塘人篤于族姻有貧不能自立者周給之  
置地俞家塢塈其棺久暴露者又以餘地建普同塔藏無

主胔骼

浙江通志

吳甲字履賞錢塘貢生從子業賈貧千金力爲補苴有友江某貧不能娶贈以金復畀以衣飾西湖舊有義塚年久爲牛馬踩躡屍骸暴露捐資掩之舊志

方啟元字貞甫錢塘人性狷介嚴義利之辨父與舅氏陳三治共經紀積資數千宜均析啟元力却之舅氏因以舊宅畀啟元啟元治宅得埋金卽出徙他所檢還舅氏子浙江志

通志

王之臣字仰峰昌化人家貧以狷介聞偶憇于亭拾一囊  
啟之兼金三百也候三日還遺者昌化縣志

章日焰字燦明昌化人康熙辛丑歲旱設粥廠賑飢乾隆

甲子大水捐穀一百石貯社倉

昌化縣志

許宏祚字貽豐號玉沙錢塘諸生以歲貢候選司訓家貧無立錚地口不言貧握筆苦吟不知絕糧爲病家人亦不聞交謫語稚子捧書琅琅課誦不輟客虞山與章信園友誼尤篤後館禾中聞信園被謫急謝館送其家人至京師流離辛苦中途囊無一錢稱貸以達人咸義之錄

尊聞

姚昌宇禹疇仁和人葬母橫山時會大雨未及窆所而瞑露處柩側立泥淖中達旦客闌時同舍人病且死託以千金持其喪歸以金畀其家封識如故買地鳳凰山葬無後者歲若干人施櫓于宗陽宮者三十年

道古堂集

周綏字傅忠海寧人嘗之山左居民流徙見鬻妻子者輒解囊止之州旱有病渴仆地者亟救以藥死卽槨埋之

海寧

州志

許澂字靜夫錢塘人有業在太倉及浦江辛壬間大饑首創平糶設粥厯躬自料檢全活無筭故家甚貧不能自存鬻其女捐金贖還擇士人嫁焉

舊志

王克肇字修遠昌化人有陳氏者娶媳待年質某氏某計納爲妾陳以白克肇克肇贖之歸于陳夏某極貧累世單傳爲之婚遂有子

昌化縣志

孫榮芳字子華錢塘人娶婦朱有子而朱歿榮芳誓不再

娶年八十九太守楊景震表其閭曰篤義康齡

孫見龍撰  
孫榮芳傳

陸宏新城武舉性伉爽急公嘗捐祠田十五畝捐學田三

十二畝

公舉事實

章知鄂字在明於潛諸生好施于乾隆二十五年捐社穀三百四十一石事聞議敘

公舉事實

陳永熹字聖功於潛監生家素封婦歿不再娶與兩兄同居無私蓄鄉閭義舉必身先之

吳泰撰  
陳傳

高表臨安人禮部儒士以長厚自任子孫蕃庶悉教以禮

讓家門雍肅有萬石風

舊志

茅瀚字靜遠仁和人本姓陳性慈和勇于爲善好觀著作

畫入能品江淮燕趙間得其尺幅珍若夜光喜放生歲  
活鱠鯉龜鼈蛤以億計一夕出遭牽牛者牛若知渝能  
活之殼觫殊甚詢之將就屠遂贖舍之嘗重建城北拱宸  
橋主辦京師全浙會館總制李敏達公器之見則呼爲善  
人敏達欲鑿橫渠城中瀚爲殘地脈固爭乃止積行上聞  
恩敘五品大夫梁文泓茅瀚傳子陳敬性能默識書傳熟于內典與人  
交和易而有節好施與急予義戚黨以爲有父風吳穎芳撰傳

徐熙字麗舍錢塘人除夕過萬松嶺拾有遺橐橐中值約  
百金坐待其人還之就館京師忽夢亡母心動遽歸守墳

墓沈廷標撰

徐熙傳

王佑賢字聖翼錢塘人幼孤力学自號慎安精于醫所得輒周貧乏廵按牟雲龍薦不就廷有古梅頗愛之當道者移之官舍不活還植復榮人號返魂香樹題咏甚多適梅遭焚而佑賢卒學者私謚孝惠崇祀鄉賢舊志

張瑞鳳性孝友爲宗族分膳田置祭產慨慷好施凡有所求未嘗以無爲解至若築橋梁掩遺骨無不奮臂爲之子兆熊兆忠兆信樂善好義能繼父志舊志

應聖裁字禹傳海寧人好施與有隱德鄰竈無炊烟暮夜袖金贈之乾隆丙子歲饑捐賑讓敘海寧舊志

曹以忠字遠昭海寧人乾隆十六年饑出粟助賑舊志

馬彪字炳章海寧人性甘淡泊仗義好施質錢者息槩從輕貧民感之乾隆二十年歲祲捐賑大吏奏聞議敘

海寧州志

章兆鉉字韶鳴海寧監生乾隆十三年二十一年米價翔

踴捐賑里中復按里中戶口給之錢

海寧州志

許承基字長人號默齋侯選知府詹事府主簿睢陽太守遠後裔知州鼎鈞子鼎鈞以學行著稱承基善繼先志兄弟友愛無間性樂施濟捐千金于會城育嬰堂生息乾隆十六年歲歉出粟平糶二十一年復倡施以賑餓者先後全活無算二十四年糾族人建宗祠費千金又輸生息銀千金捐祭田百畝二十九年復捐祠屋千金義田百畝又

修郡學宮仁和錢塘以次舉行又捐文廟歲修生息銀千

金他若極貧焚券濬河築路懿行甚多

公舉事實

汪立恒字寶符號代門錢塘國子生娶范氏生一子而歿

立恒時甫踰冠遂終身不娶不畜姬侍仙佛之說旁羅博

涉季年導引有得時危坐默存終夜不復欹臥

金甡撰汪代門傳

章鏗昌化諸生邑城西塔圓坂舊田間有水患溝埂衝決  
鏗獨肩其任鳩工伐石鑿渠築埂引水溉田費銀三千二

百餘兩爲桑梓利巡撫熊學鵠上其事

恩賞八品頂帶乾隆丙子歲歉出粟三百石以濟貧民

昌化縣冊

章鉅昌化人乾隆丙子歲歉捐銀三百兩以濟鄉里又捐

銀二百兩入公生息爲科舉薪水資斧

昌化題冊

汪世勳字捷三錢塘人少穎異九歲爲諸生後循例銓授刑部貴州司主事需次員外郎乞假歸生平直諒坦易與人交誠意懇至遇弱不能自振及以緩急告者輒傾囊以助戚黨中有貧女未字爲擇配理裝送之先世居黟縣宏村省視邱壘惠周宗族有雍睦之風行狀

孫宗濂字栗忱仁和人乾隆甲子舉人好藏書築壽松堂以儲之嘗受學於錢載曾及載曾歿廩其妻子終身故人子湯憲胡一謗有雋才招至家塾教養之俾有成立湯萼棠假館其家遭危疾力治之捐千金不問出入病遂愈乙

亥歲祲出粟千石濟鄉人事聞得議敘

道古堂集

胡龍友字宸瞻仁和人善醫就市賣藥有韓康伯風貧者不取值有友孫姓得危疾羣醫束手龍友晝夜療治量水稱藥不辭勞瘁愈其疾而歸其篤交誼如此喜讀康濟錄荒政叢書先憂集嘗語人曰醫雖可活人不若三書預備水旱活人更無算也

汪流撰傳

金潮字玉濤錢塘人四歲喪母撻踊如成人事繼母盡孝承父志增置祀田周卹族黨歲祲出粟濟鄉人得議敘居父喪毀瘠過甚服闋遂卒

公舉事實

汪鵬字翼蒼仁和人通文史旁及書畫慷慨好施予朋好

中孤寒者助膏火以成其名親弔有婚嫁不克舉者成全之嘗泛海往來浪華島購古本孝經皇侃論語疏七經孟子攷異流傳中土後歿于舟中先是海舶例不攜棺入中土十年前有客死者鵬爲島中人言之得破格從事至是不煩請託竟舉喪以歸人謂忠信之報云行畧

洪青選新城人有才而尙義嘗於文廟左建魁星閣又於三溪鎮建文昌閣縣人德之家傳

王廷瑜字去瑕仁和人孝友敦睦祖籍新安舊有西臯宗祠遠不及祔每以爲憾其孫梟等承先志建祠於柳州之

糜顏曰西臯草堂春秋祭祀

家傳

汪賢字希聖錢塘貢生家貧棄舉業奔走四方以膳養父  
母伯叔暨弟妹族屬孀孤歲時濟給買地三台山宅戚黨  
之無歸者山陰花徑村置義學江干梵村浦爲往來孔道  
徒涉殊艱賢首捐金建大石橋名曰感應復以衆助餘金  
建廟擇僧居守俾給道途薑茗人甚德之

吳頴  
芳撰